


Vischnaunca da Medel/Lucmagn



**Reglament per diever da localitads publicas
en casa da scola e scoletta a Curaglia e Platta
per la
vischnaunca da Medel/Lucmagn**

Art. 1 Determinaziuns

¹ Las casas da scola e scoletta cun inventari ein proprietad dalla vischnaunca. Il far diever da quellas localitads drova ina lubientscha speciala dil cau dil departament. Las lubientschas vegnan mintgamai concedidas digl organ cumpetent.

² Il cau dil departament survigilescha ensemen cul pedel ils baghetgs ed igl inventari general. Els fan da temps en temps controlla.

Art. 2 Diever da localitads en baghetgs publics

¹ Scadina uniun ni societad locala che promova la cultura en vischnaunca sa far diever da locals publics per emprovas e presentaziuns. Ina damonda a scret al cau dil departament ei d'inoltrar annualmein, e quei sil pli tard 15 dis avon igl emprem termin.

² Per occasiuns specialas da privats sco divertiments, fiastas, exposiziuns, cuors etc. sa vegnir fatg diever da locals publics sut ina indemnisaziun commensurada. Ina damonda a scret al cau dil departament ei d'inoltrar entochen sil pli tard in meins avon il termin.

³ Il diever dallas apparatusas ed indrezs electricis stattan sut la survegionza d'ina persuna responsabla persuerter.

Art. 3 Radunonzas

Per impedir collisiuns da termins ei il diever dallas localitads per radunonzas ni orientaziuns d'annunziar ad uras al cau dil departament. Il local vegn preparaus dil pedel.

Art. 4 Donns

¹ Il pedel controllescha e survigilescha il diever dallas localitads cun dar rapport al cau dil departament en cass ch'ils locals vegnan returnai en schliet stan.

² Per donns caschunai vid localitads ni vid igl inventari ein las uniuns ni gruppas che fan diever responsablas.

Art. 5 Far tschupials

Far tschupials e matgs per fiastas ecclesiasticas ni profanas duei succeder en casa da scola a Platta.

Art. 6 Lubientscha per seras da recreaziun

Per diever dallas localitads ed inventari per organisar ina sera da recreaziun ni ina fiasta populara ei da far ina damonda a scret al cau dil departament, e quei sil pli tard in meins avon l'ocasiun.

Art. 7 Surdada

Il pedel surdat al responsabel dall'ocasiun las localitads cun igl inventari sco era las clavs per diever. Quel ei responsabels ch'ils locals ed igl inventari vegnan returnai en uorden al pedel. Per donns caschunai vid locals ed inventari ei il proponent (uniun, societad, gruppa) responsabels.

Art. 8 Schubergiar

¹ Ei stat liber a mintgin da schubergiar sez ni schar schubergiar il pedel las localitads duvradas.

² Vegn ei schubergiau dall'uniun, stat il material da schubergiar a disposiziun.

³ Vegn il schubergiar surdau al pedel, sto quel vegnir indemnisaus dall'uniun per sia lavur. La tariffa vegn fixada sco la lavur cumina.

⁴ Las localitads vegnan pridas giu dil pedel mo en preschientscha dil responsabel dall'ocasiun. En quei mument han las clavs da vegnir returnadas.

Art. 9 Taxas da diever

¹ Per il diever da locals ed inventari en locals publics dallas casas da scola ed aula a Curaglia e Platta vegn incassau negina taxa allas uniuns e societads localas. Per cass specials sa la suprastonza communal decide davart ina eventuala taxa da diever.

² Per diever d'uniuns ni societads d'ordeifer sa la suprastonza communal fixar ina taxa.

Art. 10 Determinaziuns finalas

¹ Quest reglament passa en vigur cun l'acceptaziun dalla radunonza communal. El remplazza il reglament per diever da localitads en casa da scola a Curaglia e Platta per la vischnaunca da Medel/Lucmagn dils 12 da december 2002.

² Quest reglament ei vegnius approbaus dalla radunonza communal dils 16 da december 2004.

Il president communal:

Il canzlist communal:

Claudio Simonet

Valentin Pally